

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN KHOO SOO SEANG [ TEBRAU ]**

**TARIKH : 29.10. 2015**

**SOALAN :**

Tuan Khoo Soo Seang [ Tebrau ] minta **MENTERI PENDIDIKAN TINGGI** menyatakan apakah perincian “Integrated Cumulative Grade Point Average” (iCGPA) program percubaan yang telah dijalankan di lima buah universiti awam dan bagaimanakah iCGPA berupaya membentuk kualiti graduan yang tinggi serta memenuhi kehendak pasaran.

**JAWAPAN**

Tuan Yang di-Pertua,

Untuk makluman Ahli Yang Berhormat, Purata Nilai Gred Keseluruhan Bersepadu atau Integrated Cumulative Grade Point Average (iCGPA) adalah suatu nilai yang memperlihatkan pencapaian pelajar dalam menguasai hasil pembelajaran program bagi setiap semester sepanjang tempoh pengajian. Ia merupakan salah satu inisiatif di bawah Lonjakan 1: Graduan Holistik, Berciri Keusahawanan dan Seimbang dalam Pelan Pembangunan Pendidikan Malaysia 2015-2025 (Pendidikan Tinggi). Prestasi pelajar akan dinilai dengan menggunakan kaedah “*Spider Web*”.

iCGPA tidak hanya mentaksir pengetahuan dan kemahiran berfikir (sebagaimana amalan sekarang) tetapi juga dapat mentaksir atribut utama lain yang merangkumi aspirasi pelajar; etika dan kerohanian; kemahiran kepimpinan; jati diri kebangsaan; dan penguasaan bahasa.

Melalui iCGPA, pelajar bukan sahaja dinilai dalam bidang akademik, namun turut diukur dari segi kemahiran insaniah, berpengetahuan, nilai-nilai murni, berkepimpinan dan kebolehan berfikir secara kritis. Matlamatnya adalah untuk menganjak minda pelajar daripada sebagai pencari pekerjaan (*job seeker*) kepada penjana pekerjaan (*job creator*) untuk masyarakat dan negara. Dalam erti kata lain, pada masa hadapan lepasan dari institusi pendidikan tinggi tidak lagi bergantung kepada pekerjaan di sektor kerajaan tetapi berupaya mencipta pekerjaan untuk orang lain.

Oleh itu, kualiti pelajar dapat dikenal pasti lebih awal agar program bimbingan dapat ditawarkan dalam usaha menambahbaik keupayaan graduan sebelum mereka melangkah ke alam pekerjaan. Pihak industri atau majikan juga dapat mengenal pasti keupayaan dan kesesuaian graduan dengan bidang pekerjaan yang dipohon melalui iCGPA.